

PELAKSANAAN KUTIPAN ZAKAT EMAS: AMALAN DAN PELAKSANAAN INSTITUSI ZAKAT MALAYSIA

Hairulfazli Mohammad Som

Jabatan Syariah, Fakulti Syariah & Undang-Undang, Aras 2, Blok Akademik 3, Kolej Universiti Islam Antarabangsa Selangor (KUIS), Bandar Seri Putra, 43000 Kajang, Selangor Darul Ehsan.
hairulfazli@kuis.edu.my

Muhsin Nor Paizin

² Pusat Pungutan Zakat, Wisma PPZ, 68-1-6, Dataran Shamelin, Jalan 4/91, 56100 Taman Shamelin Perkasa, Kuala Lumpur
muhsin.paizin@zakat.com.my

ABSTRAK

Emas merupakan sejenis logam yang sangat berharga dan berguna. Sejarah telah membuktikan sepanjang ketamadunan awal Islam, emas merupakan medium utama selain perak bagi pertukaran (barter) dan alat transaksi bagi mendapatkan produk yang diperlukan. Emas juga ditempa dan dijadikan sebagai barang kemas wanita, perhiasan dan lambang kemegahan bagi pemiliknya. Mutakhir, emas mula mendapat tempat sebagai alat mendapatkan keuntungan pelaburan dengan pemilikan berbentuk jongkong, syiling dan akaun pelaburan serta sebagai alat penyimpanan nilai. Syariah menganggap emas adalah sumber kekayaan yang berkembang dan ia wajib dikenakan zakat apabila pemilikannya melebihi nisab. Walau bagaimanapun, pengiraan zakat terhadap emas mula berubah apabila niat pemilikannya berbeza contohnya, emas yang disimpan diwajibkan zakat apabila melebihi kadar nisab iaitu 85 gram, manakala emas perhiasan wanita pula hanya diwajibkan zakat apabila melebihi kadar uruf setempat. Lantas, institusi zakat di Malaysia mula menyusun pelbagai strategi mendapatkan formula pengiraan zakat yang terbaik terhadap kepelbagaian pemilikan emas. Kajian ini akan melihat proses pengiraan zakat terhadap sebahagian daripada kepelbagaian jenis emas yang kini telah diamalkan di beberapa Institusi Zakat di Malaysia.

Kata Kunci: zakat; emas; pengiraan; institusi zakat

PENGENALAN

Zakat dari sudut bahasa ialah bersih, suci, bertambah dan berkembang. Zakat juga boleh diertikan sebagai suatu rahmat, kebaikan, penyucian dan peningkatan. Zakat dari sudut istilah ialah mengeluarkan sebahagian harta yang tertentu kepada asnaf yang berhak dengan syarat-syarat yang tertentu. Perkataan zakat telah diulangi dalam kitab suci Al-Quran sebanyak 30 kali. 27 kali daripadanya digandingkan dengan perintah menunaikan sembahyang dalam satu ayat, antaranya terdapat dalam surah Al-Baqarah ayat 110 yang bermaksud:

“Dan dirikanlah oleh kamu akan sembahyang dan tunaikanlah zakat; dan apa jua yang kamu dahulukan dari kebaikan untuk diri kamu, tentulah kamu akan mendapat balasan pahalanya di sisi Allah. Sesungguhnya Allah sentiasa Melihat segala yang kamu kerjakan.”[Al-Baqarah (2): 110]

Sesungguhnya zakat merupakan suatu kewajiban yang diperintahkan oleh Allah SWT dan kepentingannya meletakkan kedudukan menunaikan zakat dalam rukun Islam yang lima, seperti dalam hadith yang bermaksud:

“Daripada Abu Abdul Rahman Abdullah ibn 'Umar ibn al-Khatthab R.A beliau berkata: Aku telah mendengar Rasulullah SAW bersabda: Islam itu terbina atas lima perkara: Naik saksi mengaku bahawa sesungguhnya tiada Tuhan melainkan Allah dan bahawa sesungguhnya Muhammad itu adalah Utusan Allah, Mendirikan sembahyang, mengeluarkan zakat, mengerjakan haji ke Baitullah dan menunaikan puasa pada bulan Ramadhan” (Sahih Bukhari. Kitab al-Iman: 8)

Demikian kewajiban zakat dalam islam yang jika diingkari akan mendapat balasan seperti yang dinyatakan dalam Firman Allah SWT yang bermaksud :

“Dan jangan sekali-kali orang-orang yang bakhil dengan hartabenda yang telah dikurniakan Allah kepada mereka dari kemurahanNya – menyangka bahawa keadaan bakhilnya itu baik bagi mereka. Bahkan ia adalah buruk bagi mereka. Mereka akan dikalungkan (diseksa) dengan apa yang mereka bakhilkan itu pada hari kiamat kelak. Dan bagi Allah jualah hak milik segala warisan (isi) langit dan bumi. Dan (ingatlah), Allah Maha Mengetahui dengan mendalam akan segala yang kamu kerjakan” [Ali 'Imran(3): 180]

dan juga peringatan daripada Sabda Nabi SAW yang bermaksud :

“Dari Ibnu 'Umar ra berkata: Sabda Rasulullah SAW: “Tidaklah mereka (manusia) itu enggan mengeluarkan zakat daripada harta mereka melainkan sebenarnya mereka menyebabkan hujan tidak turun dari langit. Kalaulah tidak kerana (kasih Allah kepada) haiwan-haiwan, nescaya manusia tidak merasai hujan” (Ibnu Majah. Kitab Al-Fitan: Bab al-'Uqubat: Jil. 2: 4019)

Zakat juga memberi kesan terhadap pentadbiran sesebuah negara dengan menjamin keadilan dan kestabilan sosial serta mampu merapatkan jurang pendapatan antara masyarakat dan menghindari dari berlakunya permusuhan dan sifat dengki sesama manusia. Buktinya zakat hanya untuk golongan yang dikhaskan sahaja seperti disebut dalam Al-Quran, yang bermaksud:

“Sesungguhnya sedekah-sedekah (zakat) itu hanyalah untuk orang-orang faqir, dan orang-orang miskin, dan 'amil-'amil yang mengurusnya, dan mu'allaf yang dijinakkan hatinya, dan untuk hamba-hamba yang hendak memerdekakan dirinya, dan orang-orang yang berhutang, dan untuk (dibelanjakan pada) jalan Allah, dan orang-orang musafir (yang keputusan) dalam perjalanan. (Ketetapan hukum yang demikian itu ialah) sebagai satu ketetapan (yang datangnya) dari Allah. Dan (ingatlah) Allah Maha Mengetahui, lagi Maha Bijaksana.” [At-Taubah (9): 60]

Menurut Mahmood Zuhdi (2003), sebagai salah satu daripada rukun Islam yang lima, zakat mempunyai latar belakang yang kuat dalam pembinaan Islam sebagai satu keseluruhan. Berdasarkan latar belakang ini, zakat boleh disifatkan secara mudah sebagai tonggak kewangan dan sosial dalam Islam.

JENIS ZAKAT

Zakat secara umum boleh dikategorikan kepada dua jenis, iaitu zakat fitrah dan zakat harta. Zakat fitrah merupakan zakat peribadi juga dikenali sebagai zakat badan ataupun zakat bulan Ramadhan yang kewajipannya hanya pada bulan Ramadhan sahaja. Zakat harta pula adalah kadar tertentu dari pemilikan harta tertentu melalui syarat tertentu dan diserahkan kepada golongan tertentu yang jenisnya terdiri daripada zakat emas, zakat wang simpanan, zakat pendapatan, zakat perniagaan, zakat saham, dan sebagainya yang jenisnya berkembang selaras dengan definisi dan pemilikan harta yang sentiasa berubah dalam sesuatu zaman. Maka, kajian ini hanya akan menghadkan penelitian kepada zakat atas emas sahaja.

KEWAJIPAN ZAKAT ATAS EMAS

Islam memandang emas sebagai simbol kekayaan harta yang berharga dan mampu berkembang. Semasa waktu awal perkembangan Islam, masyarakat Arab menggunakan emas sebagai wang dalam urusan jual beli. Emas-emas ditempa menjadi kepingan berbentuk syiling (dinar) dan nilainya ditentukan atas berat emas tersebut. Emas juga dibentuk menjadi barang perhiasan wanita, oleh sebab keistimewaan yang dimiliki oleh emas dan jelas menjadi ukuran kekayaan seseorang, Allah SWT mewajibkan zakat ke atas emas. Kewajipan menunaikan zakat emas telah disebutkan secara terang dan jelas dalam kitab suci al-Quran yang bermaksud:

“Dan (ingatlah) orang-orang yang menyimpan emas dan perak serta tidak membelanjakannya pada jalan Allah, maka khabarkanlah kepada mereka dengan (balasan) azab seksa yang tidak terperi sakitnya. (Iaitu) pada hari dibakar emas perak (dan harta benda) itu dalam neraka jahanam, lalu diselar dengannya dahi mereka, dan rusuk mereka, serta belakang mereka (sambil dikatakan kepada mereka): “Inilah apa yang telah kamu simpan untuk diri kamu sendiri, oleh itu rasalah (azab dari) apa yang kamu simpan itu” [At-Taubah (9): 34-35]

Abu Hurairah meriwayatkan Rasulullah SAW bersabda yang bermaksud:

“Siapa sahaja yang menjadi tuan punya emas dan perak dan tidak menunaikan zakatnya, pada hari kiamat nanti akan disediakan kepadanya hamparan api yang dipanaskan oleh neraka. Dengan api itulah akan diselarkan rusuk dan belakangnya...” (Sahih Muslim. Kitab al-Zakat: 2161)

PENETAPAN KEWAJIPAN ZAKAT ATAS EMAS

Umumnya emas yang boleh dizakatkan terbahagi kepada 3 jenis iaitu:

- Emas yang disimpan
- Emas perhiasan wanita, dan
- Emas diniatkan untuk pelaburan dan membuat keuntungan

Zakat Emas Yang Tidak Dipakai (Disimpan dan Untuk Pelaburan)

Zakat atas emas yang disimpan dan emas untuk pelaburan hanya menjadi wajib apabila melebihi batas minimum pemilikannya iaitu dipanggil sebagai nisab. Ulama sepakat nisab bagi zakat emas disimpan bersamaan dengan 20 dinar (85 gram). Hadith daripada Ibn Umar, melaporkan bahawa yang bermaksud:

“Setiap daripada 20 dinar atau lebih, Rasulullah SAW mengambil setengah dinar, dan daripada 40 dinar (sebanyak) satu dinar” (Sunan Ibn Majah. Bab Zakat: 1791)

Zakat emas juga hanya wajib apabila telah melepasi tempoh masa emas tersebut dimiliki iaitu 12 bulan atau setahun yang dipanggil sebagai haul sebagaimana sabda Rasulullah SAW yang bermaksud:

“Tiada wajib atas kamu sesuatu pun iaitu pada emas sehingga ada 20 dinar dan telah cukup haul wajib padanya setengah dinar. Apa yang lebih dari itu, mengikut kiraan yang sama”(Sunan Abu Dawud. Kitab al-Zakat: 1568)

Diriwayatkan oleh Aishah yang bermaksud:

“Aku mendengar Rasulullah bersabda: ‘Tidak ada zakat ke atas harta sehingga cukup Haul (satu tahun) telah berlalu.’”(Sunan Ibn Majah. Bab Zakat: 1792)

Adapun, banyak perbincangan telah dibuat oleh para ulama dahulu dan sekarang bagi menentukan nisab emas (gram) berpandukan dinar yang digunakan pada zaman Rasulullah SAW. Mengikut Dr. Yusuf al-Qardhawi, berbagai-bagai kaedah telah digunakan untuk mengetahui nilai berkenaan walau bagaimanapun, kaedah yang paling sesuai ialah dengan merujuk bahan yang masih tersimpan di sesetengah muzium yang masih menyimpan kepingan dinar dan dirham dahulu. Perdebatan nisab gram ini berterusan dengan pelbagai pandangan yang mengatakan nisab adalah antara 85 hinggalah 90 gram. Namun, penentuan mengenai nisab mempunyai perbincangannya yang tersendiri dan tidak akan dimasukkan secara terperinci didalam kajian ini. Justeru, adalah lebih menepati dan menyamai pelaksanaan di kebanyakan institusi zakat dunia yang menggunakan 85 gram sebagai asas nisab zakat terhadap emas.

Zakat Emas Perhiasan Wanita

Menurut jumhur ulama, zakat tidak diwajibkan keatas emas yang dijadikan perhiasan wanita. Hujah mereka ialah tiada dalil yang memerintahkan supaya para wanita mengeluarkan zakat bagi perhiasan yang mereka pakai, di samping isteri-isteri Nabi dan isteri para sahabat sendiri tidak pernah mengeluarkan zakat ke atas barang perhiasan mereka seperti riwayat yang bermaksud:

“Dari Abd ar-Rahman ibn al-Qasim dari bapanya bahawa Saidatina Aisyah ra, isteri Nabi, menjaga beberapa orang anak yatim perempuan di rumahnya (iaitu anak-anak saudaranya). Mereka memakai perhiasan-perhiasan dan Aisyah tidak pernah mengeluarkan zakat untuk perhiasan-perhiasan tersebut” (al-Muwatta’ Imam Malik: Bab Zakat: No. 10)

dan diriwayatkan juga yang bermaksud:

“Dari Nafi bahawasanya Abdullah ibn Umar, seorang sahabat, memberi pakai perhiasan-perhiasan emas kepada anak-anak perempuan dan hamba-hamba perempuannya, namun dia tidak pernah mengeluarkan zakat untuk perhiasan-perhiasan tersebut” (al-Muwatta’ Imam Malik: Bab Zakat: No. 11)

Seorang wanita harus membayar zakat perhiasan yang sudah tidak dipakai lagi kerana sudah lama atau sebab lainnya. Pendapat ini turut didokongi oleh Imam Ahmad, Imam Asy-Syafii, Imam Malik, Ibnu Taimiyah dan Ibnu Qayyim. Dr. Yusuf Al-Qardhawi dalam kitabnya *Fiqh Al-Zakah* (Bahagian 3: Bab 3), setelah melihat pelbagai pandangan, menyatakan pandangan yang rajih (kuat) ialah zakat tidak wajib ke atas emas perhiasan wanita, namun dikecualikan jika termasuk dalam salah satu daripada dua keadaan iaitu:

1. Perhiasan emas yang dibuat bukan untuk dipakai tetapi untuk disimpan yakni dijadikan aset simpanan, maka wajib dikeluarkan zakat ke atasnya kerana emas tersebut telah beralih dari perhiasan kepada simpanan.
2. Perhiasan yang dimiliki itu terlalu banyak sehingga masuk dalam kategori berlebihan dan melampaui kadar yang biasa dipakai oleh wanita-wanita setempat (uruf). Apa yang berlebihan dengan adat dan kebiasaan adalah dilarang atau tidak digalakkan oleh Shari’ah. Imam al-Nawawi berkata; “Menurut mazhab Syafie; berhujah bahawa barang perhiasan dibolehkan hanya jika tidak melebihi batas berlebih-lebihan yang tidak perlu, tetapi apabila melebihi batas, maka ia diharamkan menurut ahli hukum di Iraq” (al-Majmu’ Imam al-Nawawi, Vol. 6, p.40)

Dengan dijadikan emas sebagai barang perhiasan untuk kegunaan peribadi, emas berkenaan tidak lagi bersifat subur dan berkembang. Sedangkan zakat pada dasarnya diambil daripada harta-harta yang subur atau dicadang untuk dikembangkan. Mengenai perhiasan yang harus, telah disepakati juga oleh ulama bahawa perhiasan yang dibuat dari logam yang lain dari emas dan perak sekalipun harganya lebih mahal dari emas dan perak (seperti nikel, platinum, tembaga, batu-batu berharga seperti permata, zamrud dan sebagainya) tidak wajib dikeluarkan zakat sama ada yang dipakai oleh lelaki atau wanita.

KONSEP DAN SENARIO KUTIPAN ZAKAT EMAS DI MALAYSIA

Seperti yang dinyatakan sebelum ini, nisab dijadikan sebagai sandaran minimum harta yang harus dimiliki bagi zakat emas dan zakat harta yang lain. Nisab Zakat Emas bersesuaian dengan hadith yang bermaksud:

Kamu tidak diwajibkan membayar zakat emas kecuali apabila telah cukup 20 dinar (85 gram), sekiranya telah cukup 20 dinar kamu perlu membayar zakatnya sebanyak setengah misqal (Hadith. Sunan Abu Dawud: Bab al-Zakat: 1568)

Demikian daripada sabda Nabi SAW, tangga nisab yang berubah setiap tahun disebabkan oleh perletakan nilai (harga/price/value) emas harian dalam jumlah 85 gram emas. (Adapun bagi jenis zakat pertanian, zakat galian, zakat ternakan dan zakat harta rikaz mempunyai nisabnya yang tersendiri).

Jadual 1: Statistik Nisab Zakat Harta di Wilayah Persekutuan, Malaysia

Tahun	Nisab Gunapakai (RM)	Purata Harga Emas Harian (RM)
2019	13,968	164.33
2018	14,772	173.79
2017	14,083	165.68
2016	12,335	145.12
2015	11,308	133.04
2014	12,223	143.80
2013	14,066	165.48
2012	13,113	154.27
2011	10,300	121.17
2010	9,300	109.41
2009	8,000	94.11

Sumber: Akademi Zakat, PPZ-MAIWP, 2019

Undang-Undang Pentadbiran Agama Islam

Di Malaysia, tiada akta atau enakmen khusus berkenaan zakat emas, namun terdapat beberapa negeri yang telah mewujudkan peruntukan untuk memastikan setiap orang Islam yang layak, membayar zakat dan zakat itu hanyalah dibayar kepada amil yang dilantik antaranya:

- **Kesalahan Jenayah Syariah (Wilayah-Wilayah Pesekutuan) 1997 (Akta 559)**
Subseksyen 33 menyatakan: “Mana-mana orang yang memungut zakat atau fitrah atau menyebabkan dipungut zakat atau fitrah tanpa dia dilantik sebagai amil atau selainnya diberikuasa oleh Majlis adalah melakukan suatu kesalahan dan apabila disabitkan boleh

didenda tidak melebihi tiga ribu ringgit atau dipenjarakan selama tempoh tidak melebihi dua tahun atau kedua-duanya, dan Mahkamah hendaklah memerintahkan supaya pungutan itu dirampas dan dibayar ke dalam Kumpulan Wang yang ditubuhkan di bawah seksyen 60 Akta Pentadbiran.”

▪ **Enakmen Majlis Agama Islam Dan Adat Istiadat Melayu Kelantan 1994**

Dalam Seksyen 59 menyebut bahawa: “Kecuali diperuntukkan sebaliknya di dalam Enakmen ini, Majlis hendaklah bertanggungjawab secara langsung dalam urusan memungut zakat harta, galian, rikaz dan lain-lain.” Manakala dalam Seksyen 2(Tafsiran)(1) mendefinisikan: “zakat ertinya sebahagian daripada hartabenda termasuk padi, emas, perak, wang tunai, binatang ternakan, barang-barang perniagaan, harta galian, rikaz dan lain-lain yang wajib dibayar atau dikeluarkan oleh tiap-tiap orang Islam apabila cukup syaratnya mengikut Hukum Syarak.”

▪ **Enakmen Pentadbiran Undang-Undang Islam (Pahang) 1991**

Bahagian I–Seksyen 2(Tafsiran)(1) mendefinisikan: "zakat ertinya sebahagian daripada hasil tahunan penanaman padi dan sebahagian daripada pendapatan perniagaan, ternakan dan termasuklah wang simpanan, emas dan perak menurut Hukum Syarak.” Yakni jika tidak membayar zakat akan didenda mengikut Enakmen Pentadbiran Ugama Islam Dan Adat Resam Melayu Pahang 1982, Bahagian IX Kesalahan, Seksyen 171(1) menyatakan: “Sesiapa yang wajib membayar zakat dan fitrah mengikut penetapan yang sah akan banyaknya dan tidak berjaya mendapatkan pengecualian daripada pembayarannya atau apa-apa keputusan yang lain tidak mahu atau dengan sengaja tidak membayarnya adalah melakukan suatu kesalahan dan apabila sabit bolehlah dihukum dengan didenda tidak lebih daripada seratus ringgit atau penjara tidak lebih daripada satu bulan atau kedua-duanya.”

▪ **Enakmen Pentadbiran Hal Ehwal Agama Islam (Terengganu) 1422H/2001M**

Fasal 74(5) menyatakan: “Zakat hendaklah dikeluarkan di atas harta benda selain daripada yang tersebut di dalam subseksyen (1), (2) dan (4) sebagaimana berikut:

- a) bagi emas, yang mulai kena dikeluarkan zakat ialah yang beratnya 20 mithqal atau lebih, pada kadar 2 ½ peratus daripada jumlah nilai harga emas yang dimiliki itu;
- d) bagi emas atau perak yang dijumpai sebagai rikaz, pada kadar 20 peratus daripada jumlah nilai harta yang dijumpai itu.

PERLAKSANAAN PENGIRAAN ZAKAT ATAS EMAS MENGIKUT NEGERI

Zakat Emas yang Disimpan

Emas yang disimpan adalah emas yang tidak dipakai, iaitu emas yang benar-benar sebagai simpanan dan tidak digunakan sebagai perhiasan walaupun fizikalnya sama seperti emas perhiasan. Jika jumlah berat (gram) emas yang disimpan itu menyamai atau melebihi nisab 85 gram, maka wajib dikeluarkan zakat keatasnya sebanyak 2.5 peratus (%). Walaubagaimanapun, sehingga 2013, terdapat perbezaan kaedah pengiraan zakat emas simpanan oleh beberapa negeri.

Jadual 2: Contoh Pengiraan Zakat Emas Simpanan

Contoh: Pada 31 Julai 2019, jika berat emas yang disimpan ialah 150 gram maka:

Negeri	Contoh Pengiraan Zakat
Pusat Pungutan Zakat (PPZ) - Wilayah Persekutuan	$150 \text{ gram} \times \text{Harga purata } 1 \text{ gram emas tahun Haul} \times 2.5\%$ $150 \text{ gram} \times \text{RM}164.33^* \times 2.5\%$ = <u>RM616.24</u>
Zakat Melaka (ZM)	$150 \text{ gram} \times \text{Harga } 1 \text{ gram emas semasa} \times 2.5\%$ $150 \text{ gram} \times \text{RM}185.07^{**} \times 2.5\%$ = <u>RM694.01</u>
Pusat Kutipan Zakat Pahang (PKZP)	$150 \text{ gram} \times \text{Harga purata } 1 \text{ gram emas bulan sebelumnya} \times 2.5\%$ $150 \text{ gram} \times \text{RM}182.37^{***} \times 2.5\%$ = <u>RM683.89</u>

* Sumber: Jadual 1: Statistik Nisab Zakat Harta di Wilayah Persekutuan, Malaysia

** Sumber: <https://www.izakat.com/kalkulator>

*** Sumber: <http://www.zakatpahang.my/index.php/zakat-emas-dan-perak>

Berdasarkan Jadual 2, dapat dilihat walaupun jumlah berat (gram) emas yang disimpan itu sama 150 gram, tetapi dapat menghasilkan jumlah bayaran zakat yang berbeza iaitu di Melaka mencatatkan amaun yang tertinggi iaitu RM694.01, dan di Wilayah Persekutuan pula RM616.24. Satu perbezaan besar berlaku hanya disebabkan penggunaan harga emas 1 gram yang berbeza. Pada asanya, perlu difahami kaedah pengambilan sumber harga emas yang berlainan serta ijtihad pelaksana di setiap negeri adalah dalam usaha untuk mencari kaedah yang terbaik.

Zakat Emas Perhiasan Wanita

Mengikut perbincangan sebelum ini, perhiasan yang dikhususkan untuk pemakaian peribadi (wanita) tidak wajib dikeluarkan zakat melainkan pemilikannya melebihi nilai adat setempat. Maka kaedah menentukan kewajipan zakat emas perhiasan adalah mengikut uruf. Walau bagaimanapun, kadar uruf di setiap negeri-negeri di Malaysia adalah berbeza-beza.

Jadual 3: Kadar Uruf bagi Zakat Emas Perhiasan Mengikut Negeri, Malaysia

Tahun	Uruf Emas Perhiasan 2012	Kenaan Zakat
W. Persekutuan	800 gram	Keseluruhan emas
Selangor	800 gram	Lebih uruf
Johor	850 gram	Lebih uruf
Terengganu	850 gram	Lebih uruf
Perak	500 gram	Keseluruhan emas

Pulau Pinang	165 gram	Keseluruhan emas
Pahang	500 gram	Keseluruhan emas
Kelantan	800 gram	Keseluruhan emas
Kedah	170 gram	Lebihan uruf
Negeri Sembilan	200 gram	Lebihan uruf
Melaka	180 gram	Lebihan uruf

Sumber: Akademi Zakat, PPZ-MAIWP, 2019

Berdasarkan senarai uruf dari Jadual 3, dapatlah dibuat contoh pengiraan seperti berikut:

Jadual 4: Contoh Pengiraan Zakat Emas Perhiasan

Contoh: Jika berat emas yang pakai sepanjang tempoh haul ialah 800 gram, maka:

Negeri	Contoh Pengiraan Zakat
Pusat Pungutan Zakat (PPZ) - Wilayah Persekutuan	$= 800 \text{ gram} \times 2.5\%$ $= 20 \text{ gram (ditukarkan ke nilai RM)}$ $= \underline{\text{RM3,286.60}}$
Lembaga Zakat Selangor (LZS) - Selangor	$= (800 \text{ gram} - \text{uruf}) \times 2.5\%$ $= (800 \text{ gram} - 800 \text{ gram}) \times 2.5\%$ $= 0 \text{ gram}$ $= \underline{\text{Tidak dikenakan zakat}}$
Pusat Zakat Melaka (PZM) - Melaka	$= (800 \text{ gram} - \text{uruf}) \times 2.5\%$ $= (800 \text{ gram} - 180 \text{ gram}) \times 2.5\%$ $= 15.5 \text{ gram (ditukarkan ke nilai RM)}$ $= \underline{\text{RM2,868.58}}$

* Harga emas per gram ditentukan mengikut penetapan negeri-negeri. Pemilik emas seharusnya mengikut kaedah tempat dia bermastautin.

Merujuk kepada Jadual 4, walaupun jumlah emas yang dipakai sama tetapi dapat mencapai amaun zakat perlu dibayar yang berbeza mengikut amalan dan uruf negeri-negeri. Jelas pengiraan zakat atas keseluruhan emas menghasilkan amaun zakat yang paling tinggi seperti di Wilayah Persekutuan (RM3,286.60), diikuti dengan kaedah yang hanya mengira atas lebihan uruf iaitu seperti di negeri Melaka (RM2,868.58). Jika pemakaian emas tidak melepasi kadar uruf yang ditetapkan maka tidak perlu mengeluarkan zakat emas perhiasan seperti di Selangor.

Perlu juga diambil perhatian bahawa belum ada formula khusus dan tepat bagi menimbang berat emas perhiasan yang bercampur dengan batu permata dan bahan lain. Melainkan pada masa kini, kaedah yang paling terbaik mendapatkan berat sebenar emas adalah dengan merujuk kepada resit belian yang disimpan oleh pemilik emas (Hamizul, 2012). Seandainya tiada resit belian, maka perlu ditolak berat batu permata berdasarkan andaian dan pengetahuan pemilik emas.

Zakat Terhadap Emas Yang Dilaburkan / Membuat Keuntungan

Perbincangan dan kajian mengenai zakat terhadap emas yang dilaburkan adalah sangat kurang. Persoalan wujud apabila sesetengah masyarakat Muslim yang terlibat dalam aktiviti pelaburan emas mula menimbulkan isu kewajipan zakat terhadap pelbagai bentuk dan jenis pelaburan emas.

Sehingga kini (2013), belum ada pelaksanaan yang jelas oleh institusi zakat Malaysia berkenaan zakat terhadap emas yang dilaburkan, malah ada sesetengah pusat zakat yang menganggap status hukum zakat emas pelaburan sama seperti emas yang disimpan. Namun, perbincangan mengenainya telah mula dijalankan sejak tahun 2013 melalui kerjasama Pusat Pungutan Zakat (PPZ) Wilayah Persekutuan, Malaysia dengan Akademi Penyelidikan Shari'ah Antarabangsa bagi Kewangan Islam (ISRA) dalam menghasilkan kertas kajian menjawab persoalan zakat emas pelaburan (Rujuk ISRA *Research Paper* No.53/2013).

Merujuk kepada kertas kajian tersebut, terdapat 4 bentuk pelaburan emas patuh syariah di Malaysia iaitu:

- Zakat emas yang diperniagakan.
 - a) Emas jongkong dan syiling yang diperniagakan – Berdasarkan pandangan yang dipilih iaitu pandangan jumhur ulama, diwajibkan zakat terhadap jongkong dan syiling emas dengan kadar 2.5% dikategorikan sebagai zakat perniagaan. Kadar adalah atas nilai emas pada akhir haul iaitu waktu wajib zakat. Nilainya mestilah melebihi nisab zakat harta, dan hanya perlu melebihi pada waktu cukup haul menurut mazhab Shafi'e. Sekiranya nilainya tidak mencukupi nisab, maka nilai tersebut perlu dicampurkan dengan nilai harta perniagaan lain, emas, perak dan wang simpanan yang lain bagi mencapai nisab.
 - b) Emas perhiasan yang diperniagakan – Terdapat 2 pandangan sama ada zakat dikenakan atas zakat emas ataupun zakat perniagaan. Maka kadar yang perlu dikeluarkan bergantung kepada jenis zakat yang dikenakan. Jika mengambil pandangan ia adalah zakat perniagaan, maka kadar 2.5% daripada nilai harta tersebut. Tetapi jika mengambil pandangan ia adalah zakat emas, maka kadar 2.5% dikeluarkan atas emas tersebut.
- Zakat emas yang dijadikan gadaian.

Merupakan teknik dimana pelabur memanipulasi skim pajak gadai. Kaedah bermula dengan pembelian emas fizikal yang boleh dipajak gadai untuk mendapatkan wang pinjaman. Hasil daripada wang pinjaman tersebut, pelabur membeli emas yang lain dan memajakkannya lagi dan proses ini diulang-ulang bagi mendapatkan pemilikan emas semaksimum mungkin. Apabila harga semasa emas meningkat, pelabur akan menebus kesemua emas yang dipajak dan menjualnya bagi mendapatkan untung. Maka dengan memilih pandangan majoriti, konsep kontrak gadaian dan tanggungan hutang tidak menjadi penghalang kepada kewajipan zakat. Justeru emas yang disimpan di pusat pajak gadai hendaklah dikenakan zakat dengan kadar 2.5% atas jumlah emas dengan nisab dan haul yang sama seperti zakat harta lain.

- Zakat emas yang disimpan oleh pihak lain

Pelaburan sebegini dijalankan dengan pembelian emas yang kemudiannya disimpan kepada pihak lain untuk menjaganya atas dasar amanah ataupun memberikan bayaran upah simpan. Sesetengah tempat menawarkan perkhidmatan peti simpanan untuk menyimpan emas. Hasil analisis, emas yang disimpan kepada pihak lain dalam bentuk amanah wajib dikenakan zakat apabila mencukupi nisab dan haul.

- Zakat emas yang dipinjamkan kepada pihak lain.
Teknik sebegini dilakukan apabila emas yang dibeli oleh pelabur diserahkan kepada penjual sebagai pinjaman (membuka akaun dsbnya), dengan itu emas yang sudah melalui transaksi jual beli tidak berada di tangan pelabur. Pelaburan seperti ini adalah patuh syariah, atas asas transaksi asal pembelian emas adalah sah dan emas telah berpindah milik kepada pembeli. Dengan pemilikan yang sah terhadap emas, dan kuasa pilihan yang diperoleh pemilik sama ada untuk menyimpan emas sendiri atau kepada pihak penjual, maka pemegang akaun (emas) adalah diwajibkan mengeluarkan zakat emas setelah ia mencukupi nisab dan haul.

Terdapat pula beberapa skim dan produk pelaburan emas di pasaran yang tidak memenuhi kriteria pelaburan patuh syariah, akibatnya timbul kekeliruan kerana sekalipun emas yang dilaburkan melalui proses transaksi tidak patuh syariah namun dari sudut undang-undang adalah sah miliknya dan boleh dikeluarkan zakat. Beberapa skim pelaburan emas tidak patuh syariah ialah:

- Pelaburan emas secara maya (ie. FOREX) – Pelabur tidak memiliki fizikal emas secara hakiki, justeru dikenakan zakat terhadap wang pelaburan (pokok) dikategorikan zakat wang simpanan. Nilainya hendaklah dikira bersama wang simpanannya yang lain bagi mencukupkan nisab dan transaksi tidak memutuskan haul asalnya.
- Pelan Pelaburan melalui pembayaran ansuran – Pelabur tidak dikenakan zakat sekiranya belum menerima emas yang dibelinya. Tetapi wajib dikeluarkan zakat emas sekiranya menerima emas dan mencukupi nisab. Manakala haul bermula pada terikh penyerahan emas kepadanya.
- Akaun pelaburan emas yang tiada kemudahan mengeluarkan emas dalam bentuk fizikal – Pelabur wajib mengeluarkan zakat wang simpanan terhadap modal pelaburan (pokok). Nilainya hendaklah dikira bersama wang simpanannya yang lain bagi mencukupkan nisab dan transaksi jual beli emas melalui kaedah ini tidak memutuskan haul wang pelaburan asal.
- Emas perhiasan yang haram – Jenis perniagaan emas yang berunsurkan haram sekiranya dibeli dan dipakai oleh lelaki. Pemilikan emas tersebut sah, tetapi tidak menggugurkan kewajipan mengeluarkan zakat emas dengan nisab 85 gram.

Oleh kerana perbincangan mengenai kewajipan zakat terhadap jenis pelaburan emas masih baru di Malaysia, maka institusi-institusi zakat seharusnya mempertimbangkan kaedah yang paling sesuai dalam pengoperasian zakat emas. Kajian ini berpendapat seharusnya dirujuk terus kepada Kertas Penyelidikan ISRA No.53/2013 untuk mendapatkan hujah dan dalil yang lebih jelas yang merumuskan kewajipan zakat atas konsep pelaburan emas.

KESIMPULAN

Setiap masyarakat muslim harus sedar, untuk menjadikan emas itu tidak berlegar dalam lingkungan orang kaya, terbeku atau tidak produktif, telah ditetapkan kewajipan umatnya untuk mengagihkan kembali harta kekayaan kepada golongan yang memerlukan. Syarak telah menetapkan agar emas yang tidak digunakan dan disimpan, wajib dikeluarkan zakat mengikut garis panduan yang ditetapkan, sementara emas yang diguna sebagai perhiasan wanita wajib dikeluarkan zakat sekira beratnya melebihi adat pemakaian setempat (uruf). Begitu juga kewajipan zakat tidak digugurkan terhadap pelbagai jenis dan skim pelaburan emas yang terdapat dalam pasaran.

Berdasarkan kepada analisis, kajian ini melihat perlunya penyelidikan dan perbincangan lebih lanjut bagi menjawab beberapa persoalan. Dari sudut zakat atas emas yang disimpan, kajian ini menganggap perlunya kesefahaman kepada para pembayar terhadap pelbagai kaedah pengiraan dan penetapan nilai emas di setiap negeri. Walaupun wujud usaha untuk menyeragamkannya, namun seharusnya tidak menjadi penghalang kepada kepelbagaian dalam pemilihan proses pengiraan.

Ini tidak lari daripada amalan yang digunapakai dalam pengiraan zakat atas emas perhiasan wanita, walaupun begitu, institusi-institusi zakat seharusnya mencari jalan dan formula terbaik menentukan nilai emas terhadap jenis-jenis dan komposisi emas dalam setiap perhiasan. Perlu juga kepada pertimbangan untuk memiliki mesin pengesan komposisi emas seperti yang terdapat di pusat pajak gadai ar-rah. Lantas daripada penggunaan teknologi yang canggih ini dapat juga membantu memperoleh berat emas diasingkan dengan berat batu permata tanpa memerlukan resit pembelian pelanggan.

Kini wujud pula fenomena baru masyarakat untuk melabur dalam pelbagai skim pelaburan emas, justeru setiap institusi zakat semestinya perlu meneruskan usaha membuat lebih banyak penyelidikan tentangnya sehingga mampu diaplikasikan terus ke dalam aktiviti dakwahnya.

RUJUKAN

- Abu Abdillah Muhammad ibn Yazid. *Sunan ibn Majah*. Vol. 1: Book 36 (Bab al-‘Uqubat). Diambil daripada <http://sunnah.com/ibnmajah>
- Abu Dawud Sulayman ibn Ash’. *Sunan Abu Dawud*. Diambil dari <http://www.hadithcollection.com/abudawud>
- Al-Qardhawi, Yusuf. (2011). *Fiqh al-Zakah*. Islamic Book Trust: Kuala Lumpur.
- Azman Ab Rahman (2012). *Keengganan Membayar Zakat Menurut Perspektif Syarak Dan Perundangan Islam Di Malaysia*. Penerbit USIM. Cetakan Pertama 2012.
- Hamizul A. Hamid. (2012). *Eksklusif Zakat*. Galeri Ilmu. Cetakan Pertama 2012.
- Hasan Bahrom (2011). *Zakat Emas Dan Perak*. *Fiqh Zakat Malaysia*, Institut Kajian Zakat (IKaZ), Pusat Penerbitan Universiti (UPENA), 121 – 131.

- Hasan Bahrom, Mohd Sirajuddin Siswadi Putera & Hajar Opir. (2013). Kaedah Penentuan Uruf Emas Dalam Zakat Perhiasan. Kertas kerja dalam *Pengurusan Zakat Kontemporari*. Institut Kajian Zakat (IKaZ), 399 -411.
- Imam Muhammad al-Bukhari. *Sahih al-Bukhari*: Bab al-Iman (Chapter 2: Belief). Diambil daripada <http://sunnah.com/bukhari>
- Imam Al-Nawawi. (1997). *al-Majmu'* Beirut: Dar al-Fikr
- Lokmanulhakim Hussain, Mohamed Fairouz Abdul Khir & Mohd Bahroddin Badri (2013). *Analisis Kewajipan Zakat Emas Terhadap Pelaburan Emas di Malaysia*. Kertas Penyelidikan ISRA No. 53/2013.
- Mahmood Zuhdi. (2003). *Pengurusan Zakat*. Kuala Lumpur: Dewan Bahasa Pustaka.
- Mohd Faisol Ibrahim & Suhaina Musani. (2010). *Zakat dan Perlaksanaanya di Malaysia*. Universiti Malaysia Sabah: Ahli Majlis Penerbitan Ilmiah Malaysia (MAPIM).
- Muslim ibn al-Hajjaj. *Sahih Muslim*. Diambil dari <http://www.hadithcollection.com/sahihmuslim>
- Malik ibn Anas. *al-Muwatta' of Imam Malik ibn Anas*. Madinah Press Inverness, Scotland. Saba Islamic Media. Terbitan 2001.
- Pusat Pungutan Zakat - Majlis Agama Islam Wilayah Persekutuan. (2012). *Laporan Zakat Tahunan 2012*. Penerbitan PPZ-MAIWP.
- Tafsir Pimpinan Ar-Rahman Kepada Pengertian Al-Qur'an cetakan kedua puluh dua. (2013). Jabatan Kemajuan Islam Malaysia: Kuala Lumpur.
- Unit Penyelidikan & Pembangunan Korporat. (2014). Data dan Statistik daripada Sistem Integrasi Zakat (SIZa). Pusat Pungutan Zakat (PPZ) – MAIWP, Kuala Lumpur.
- Statut-statut:
- Enakmen Majlis Agama Islam Dan Adat Istiadat Melayu Kelantan 1994
 - Enakmen Pentadbiran Undang-Undang Islam (Pahang) 1991
 - Enakmen Pentadbiran Hal Ehwal Agama Islam (Terengganu) 1422H/2001M
 - Akta Kesalahan Jenayah Syariah (Wilayah-Wilayah Pesekutuan) 1997 (Akta 559)
- <http://www.bloomberg.com/news/2013-04-15/gold-extends-bear-market-losses-as-investors-reduce-etp-holdings.html>
- <http://www.24hgold.com/english/home.aspx>
- <http://www.zakatpahang.my/v2/NisabZakat.aspx>